

嶼山集卷六

北海趙秉忠著

表

擬

上出

御製擬倚蘭操賜諸大臣謝表宣

德七年  
宣德七年某月某日具官臣  
某等伏蒙

上出

御製擬猗蘭操賜諸大臣臣某等  
謹奉表稱

謝者伏以

黼座舒光風之彩色借群英

龍章播幽谷之春情欣競秀採林

巖而散馥宣廊廟以增華羨  
彼人流颺茲天韻臣等誠惶  
誠恐稽首頓首上言竊惟明

揚資于喜起，猶不雜薰譌詠。  
共于臣隣宮，恒倡羽是以先。  
皇觀法縵三尺，以通太和聖。  
帝迎薰揮五絃，而暢同歆絲。  
惟立辨動君臣，忠義之思操。  
乃宣憂懼堂，陞幽深之慕自。

猗蘭絕響孔壁餘音，遂使巖  
穴之竒不獲，依于鷓羽風雲  
之遇，僅能羨于鴻飛濯丹頰。  
以表素心，千秋接軫秀紫莖。  
而俟幽賞，異代流徽伯牙定。  
作二篇彌重芳薌之物，昌黎

剛為十詠仍容清遠之人士  
林每婉孌于和音空標春雪  
震翰鮮披揚于雅弄祇屬烟  
霞送遠歸風無取漢宮翫曲  
遊絃止息豈收宋代正聲亦  
雕鏤偶及清姿終藻績非關

緬想秋風妍秀調元狩之八  
音春草炫熿悔江東之萬卷  
梁宣帝微霜之句似取幽人  
唐文皇凝露之篇時思君子  
顧紛紜江左何暇攬竟體之  
芳即清切瀛洲未能追同心

卷六  
之臭至于草生輦路哀唐恐  
刈其靈根花賞禁庭弱宋誰  
執其縹蒂此非悲謔于末運  
蕭與俱焚亦是侈詠于中朝  
莽猶同茂既文章與治術相  
爽且君道與臣寮更踈蕙畝

五  
並滋左徒咨嗟于知遇芝房  
濫奏協律沉湎于公卿馥郁  
含香未見漢官之寵渥清芬  
飲稷總勞晉詔之勤渠龍朔  
更秘省之名絲綸鮮播新豐  
渙湯池之賜粉澤虛承蕭嵩

借孫逖以冠篇朝案僅誇其  
芳質彦博托謝庭以成賦重  
臣自歎于幽貞豈無詞翰之  
時頒竟足明良之未洽損八  
紘而掩雋杰

昭代維新清六幕而煥文章

聖人能作茲蓋伏遇  
皇帝陛下

智先萬物

德暢群倫曰

績武功丕揚震疊克

光文治是集休祥

青宮夙仰神明環生麗日  
丹陛弘宣偉略石補穹天自  
親出掃乎漢氛迨

頻巡奪乎胡魄中外寧而應如風

草臣民肅而聲徹堪巖

簡兩都之憲臺爰其資業

命諸省之撫鎮鋤彼莠稂釋李學  
士于繫囚拔薛將軍于行陣  
桁揚歛涕翻依飛李之叢烽  
燧無驚總作參苓之用

詔陪遊于  
西苑故將全樹借人



勅賜沐于上元會見春芽滋雨鴻  
鸞階序誰非才數之菁英鍾  
者 呂巖廊豈秘空山之金玉頃

特紳綸綍

深注林泉收文行于隱淪恢恢天

網廣名賢于攬採整整人綱  
乃

聖慮不盡于咨嗟而

王言復宣于詠嘆倣杏壇之遺韻

和以天倪標

楓陛之新篇顯茲物性緬惟深谷

卷六  
是有孤芬近在  
崇階非無隆慕暇而寓興默則托  
言與其樂府之悲傷潛光未  
曜孰若

清朝之寤寐服媚可徵緣宮徵以  
彈

宸情不作騷人哀怨借于喁以發  
幽德何云雅調微茫羨其王  
者之香有芳獨擘跂彼善人  
之室雖隱尤光林壑英標期  
發深沉之癖烟雲曠韻俾生  
濯沐之思更從衆卉以闡奇

卷六  
姿一枝纈秀仍引群葩而揚  
遠韻十步呈馨活色天然  
睿想比玄工之鼓鑄清魂神契孤  
踪符帝賚之機緘翩翩妙杼  
于八言金石與歲莛並出斐  
斐宏宣于四韻珠璣與葱蘢

齊暉將令

紫禁之中光浮春苑宛在

鑾坡之下蔭滿玉池採掇心勤寧

惟滋英華于九畹吹噓言切  
倍覺洩標韻于雙清似發流  
水之音妙賞以達聰共叶如

召玄雲之應靈機以交感旁  
推方注念于

深宮抽為錦采及分光于廣衆朗

作雲從顧惟一二者碩之人

正可

九五咨求之助委蛇獻納入同五

夜添香協合寅恭出向千官

綉佩

宸章首賜示茲延攬之心台輔同

觀廣彼凝承之益大雅颯颯

于

殿陞許荃宰以聯和

王風灑灑于朝端引槐卿而聞馥  
式當若玉况瓊英瑤草之將共

珍

出則為絲乃隱谷深巖之可代  
致睠此公卿發跡疇非山澤  
孤騫屬夫寮采勛勞總是蘋

繁亦薦不獨明

崇高之側席急借拔茅計應啓忠  
蓋之虛心欣看集玉五雲高  
捧一日親沾上下殷殷

盛世絕當門之忌明良亶亶異時  
羞在握之恩

進御有徵已知廣大  
寵頒不偶良恃高深  
臣等樗櫟凡才遽蒞  
賤品久叨侍從漸溷  
崇班感遭遇于

先朝出為小草幸趨承于今日入  
藉

重華自念以人事君未矢卷阿之  
韻聆音察理常思元首之歌  
傳播自

天忽驚廣樂慚惶無地始信陽春  
依瑤圃以慕英遊不數連珠  
之弄近碧梧而廣美蔭疑來

雙鳳之和仰

聖翰之虛冲宛爾皇天普潤誦  
御音之恬淡冷然卿月流芬若志  
在于高山抑風清于白鵠情  
岳難求其彷彿詞瀾但想其  
源流遙跂

細旃何厭山林可採俯思交戟不  
妨黃綺同賓若夫

雲藻迴翔

龍文炳朗發聲合乎六律播樂追  
乎九韶猶稱作述之緒餘不  
免精神之糟粕自今惟佐弓

旌以博採暢志在和收杞梓  
以咸來悅人惟正心希冰鑑  
豈遺搜于梁父之吟身在玉  
壺不致惜于龜山之曲伏願

好賢非咨口實

圖理誕暢心聲如樂斯諧徧窮谷

為飛灰共應無言不試指

大廷為息壤可徵洒瑞露以成文

明晶熒觸目絢瑤華以賁治

化潤澤同滋具茨非遙即在

宸旒之上擴葛天至近惟因豐蔀

之下通五柞宮中羞漢廷以



侈賦萬年枝上超周曆以遐

占

擬宋以五臣論賜輔臣謝表

祥符八年四月四日召輔臣

觀書玉宸殿始觀太宗御書

移御別殿觀皇王帝伯四論

良臣正臣忠臣奸臣權臣五

論幸水軒垂釣辛酉賜輔臣

御製五臣論各一本

伏以

宸衷提振世之衡辨獨嚴於邪正

天語晰當官之鑑精先注於平章

藉

訓誥以開迷仰

絲綸而隕越

命傳三事驩動群工臣等誠惶誠  
 恐稽首頓首上言竊惟陳殷  
 置輔乃股肱耳目所由資詔  
 祿策勲惟忠厚正直之是與  
 人情不美世路多艱面從之  
 戒雖勤勸相之謨實鮮稽虞

夏殷周之盛內君子而外小  
 人迨漢晉隋唐之衰近儉人  
 而遠吉士徒招方正誰貢賢  
 良忠佞途分莫定名實之準  
 權奸影附猶希道義之防鄭  
 興庸而善類空陽球敗而惡

氛熾甘陵分部慨重瞻烏白  
馬安流禍生嘗露水火之形  
漸著牛羊之競無休雖當皂  
囊白簡之中尚隱杜欽栖楚  
同一錦衣玉食之事誰分越  
國汾陽善人角其勝而豺虎

潛醜類乘其瑕而天地塞巧  
行間謀陰懷金蘭混彼玉珮  
繁茲蕭艾臣愈幻而君愈眩  
治日少而亂日多蓋有患得  
患失之鄙夫天下遂無鹿馬  
效長君逢君之秘計一時盡

化蟲沙明市重而巧避權令  
舉世揣摩莫識太阿所在陽  
渙群而陰樹黨俾同人招引  
盡依魁柄而來荆榛生於畏  
塗坑塹通平岐路達人敬吻  
志士遺身集思廣益之兩不

相關顯忠遂良之一無所傳  
世如長夜時待

休明茲蓋伏遇

○○○○

仁詔群生

功濟列聖

緝熙止敬詢擇善之可行

清明在躬鑒為臣之不易頃緣

燕豫特荷

臚傳聽鸞和於

金根仰

龍飛於

玉藻香飄

別殿儉

聖祖之音容瑞啓

寶函善

文孫之繼述薰風澹澹雲沼溶溶

當

優游泮渙之時思啓沃維持之  
助昔以四端別崇高之異著  
皇帝王霸之純與不純今以  
五等窮仕宦之情別忠良權  
奸之正與不正

神周夏鼎

夢切商圖

彰痺惟嚴比日月雷霆之並運  
旌別不爽儼華袞鈇鉞以兼施  
適彼周行覺迷塗其未遠陋  
茲覆轍委顧僕於何人猶宜  
謂諸曹之風厲殊煩揆路之滌

除用始朝夕  
密勿地以近而彌危  
任以隆而易債尋聲索響直  
諒者用以求多炙手熱中關  
茸者因而納款政府實十目  
十手之地宰臣難一心一德  
之人清濁之移徙非常邪正  
之變遷有自

王言鄭重

帝鑒精專蓋

聖心求治之勤默燭於治亂興亡  
之介故

聖語望臣之切共圖於陰陽黑白  
之間臣等章句豎儒簪笏末  
品受

恩深重頂踵何知荷擔艱虞忖  
度自失望不足以動物明不  
足以知人惟是戴

主上如對天地之心盟之幽獨儻  
假寵靈以作威福之事質諸  
鬼神恩僭怨以俱忘門與心  
而似水向使陰以要君而急  
以白白縱竊納牖遇巷之迹  
終是作奸犯科藉令巧於釣



卷六  
三  
譽而鈔於因人即覩功成事  
可之勛無異怙權尸利彈冠  
結綬感奮蔚之朝濟羸角獷  
牙想獨行於遇兩敢不益勤  
法戒愈勵初終雖當八元八  
愷之朝豈忘四罪即值三俊

三宅之代尚重十愆此臣等  
所以仰荷

寵綸俯竭愚悃者也伏願  
健同乾運

善與人同

謹頌笑於燕閑弊清鼠穴

揚威靈於掌握風息神叢

寶善珍賢念培養之難而摧阻

之易

去讒賤貨惧珍行之震而放利

之窮庶大臣法小臣廉海宇

荷知人安民之澤玉燭調金

甌固群臣奏奮庸亮采之功

啓

奉霖寰李先生啓

始居畝里已僭弟子望顏色於衆  
中既入長安復從大夫企威名於  
塞外徒深譽髦之感向無干牘之

通關典極矣成我謂何恭惟老師  
閣下清朝元老昭代人豪敦卻毅  
之詩書富范公之兵甲握文衡而  
造士賞識之下盡為聞人飭武備  
以臨戎運籌于內曾無遺策故分  
旄遼左不動色而七十二衛之守

屹若金湯秉鉞嶺南未崇朝而八  
百餘年之虜散同瓦解南征北怨  
恍大旱之望雲霓此威彼懷猶沉  
疴之遇秦越既成無競之績當膺  
特簡之知迺晉中樞用躋上埒是  
歆寄以心膂豈特付之瓜牙本兵

有伏龍天下之神氣不言日振中  
國相司馬邊頭之生事毋戒自銷  
是處要荒且將望風而奔突么麼  
把赤何敢喘息而生心乃增兵乃  
增餉皆未雨為徹桑之計即不戰  
而屈人之聲非閣下之公忠何以

自決非  
皇上之獨斷何以即愈是內治外  
威之壯猷亦君明臣良之美事憶  
當時雨之化以偶隔所司未荷鑪  
鑪已幸依日之光實私淑諸人敢  
忘陶鑄故魯諸生盡出公門之莢

李而忠小子亦備藥籠之參苓媿  
濫竽無一可知將反躬末從副寔  
唯借寧靜淡薄為安身立命之根  
亦能糲食粗衣為隨境鍊心之地  
願究竟未知稅駕而始終何道指  
南望臯比之坐若斗山幾由面覲

儼菁莪之教於叅倚仰異耳提

奉孟白先生啟

伏以中臺凜冰霜駿譽早升於丹  
掖東國承雨露鴻勳直薄乎青冥  
願切登龍情傾就日恭惟老公祖  
台下日角珠庭隆公輔望繡裳赤

爲真社稷臣步趨夔龍鞭撻左馬  
譚霏玉雪真似天柱之香藹從空  
而來筆爛金蓮自是風嶺之梅花  
長開不謝蓋以學江文海遠接洙  
泗之濱乃見卿月朗星照耀翼軫  
之野培國家之命脉籌已無雙固

黎獻之元神功高第一衡文中土  
貢舉成玉筍之班督運檀州蜚輓  
壯鐵衣之色樹風聲於廉訪涵豈  
弟於承宣載鎮神臯興謠京轂天  
開帷幄帝錫師貞登泰岱而撫橫  
由玄纁肅山中之虎豹滙滄溟以

洗埃鬱青旌掃海上之鯨鯢念鴻  
鴈之民盡歸襁褓環茅路之域再  
睹桑麻滔滔夢澤流膏尚藉餘潤  
於僻壤煜煜咸池吐耀猶分剌照  
於幽林卽值震風賴茲廣廈遂令  
宿霧化作定雲戴德日見之羨墻

酬恩難報于天地惟望鵲湖明月  
跂豸府以馳神徒仰華頂清霜托  
兔毫而陳謝謹專下役上叩台端  
用攄九損之忱兼致一芹之獻希  
惟涵茹無既溯瞻

卷六  
三  
谷南都十八子

伏以綸扉登雋賡周家棫樸之歌  
玉署同升符學士瀛洲之數事際  
古今而儷美光騰鼎鉉以增榮道  
之將行喜而不寐恭惟諸賢文先  
生星緯元精璫璵重器剖綠字丹  
書之秘掩二陸於雲間抽玉函金

簡之藏駕八公於淮上鷓鴣競起  
振羽垂天騏驥空群過都歷塊雷  
震千層桃浪爭誇鼎甲蜚聲臚傳  
五色卿雲驚奏乾文垂象銅龍曉  
闕蓮燈將彩旆齊紅金馬聯鑣翠  
柳偕宮袍並綠三三六六不獨李



郭儼神仙繼繼繩繩行見韓歐儲  
將相信百年之名世侈一時之壯  
遊不佞某曩役金陵獲攀玉樹香  
飄桂苑欣逢比室芝蘭鶯報禁林  
遙想滿城桃李提携欲舞咲語如  
狂茲辱翰使之臨兼沐貺函之賜

惠而好我遠承瓊玖之投情竭知  
音莫效涓埃之報願平生志向已  
溫飽之兩忘攄疇昔謀猷願窮通  
而一致庶同朝咸事乎九德而貢  
籍永譽於萬年率爾揆裁不盡私  
祝

書牘

與邢子愿書

蓮葉真人遨遊天際即在榆枋井  
幹者莫不跂羨况耳而目面覲而  
躬逢者耶吾丈明德大業羨埒峴  
碑遠不具述一樹幟詞壇執牛耳

者垂三十載亦不具述即近所惠  
新刻數種種種竒勝文章儼如六  
朝夫論六朝于今絕響久矣丈獨  
追琢礮錯造極峰頂何論空谷足  
音也房澹師昨過名園即席走筆  
有不醉花移檄催行我怨鶯寄言

鈴閣友吾老愧稱兄不覺踴躍携  
袖歆舞竊念雄渾悲壯詩之氣格  
清和睨晚詩之韻致格高令人慷  
慨韻勝令人欣暢若離此境尚得  
稱詩尚可譚詩耶老丈篇什弟見  
頗多有沉雄嚴整處有俊語亮節

處總不作第二想乃近日詩清閒  
如話於丰韻作勝場謂不兼王杜  
而有之耶至吾丈染翰不必山陰  
不山陰只是總衆材而獨運出已  
意以爭奇以故若大若小若楷書  
行書草書都已入神化人爭寶之

弟有荒園約數畝中作大小共四區每區各以花木屈曲環之有亭有臺有石有池有佛堂丈室中亭五楹稍寬敞亭前有四柏樹蓋數百年物敷陰濃縹翠幄覆之客坐其下四五月不知暑如在涼雲綠

雪間也此亭乞大書一扁不拘是何字是幾字惟恃老丈裁定書成未有不稱善者此外再求草書數幅懸之壁間以助清興又求小楷一二紙長畫無事薰風徐來展淨几時時披玩便是餐霞飲沆灘可

遂天際真人之想快不可言然惟  
吾丈慨然揮灑弟方得有此快瞻  
慕芝宇寄羨榛苓秋中涼爽必策  
蹇驢掛一壺酒卧遊于半舫齋中  
以聽清話此快更有不可以言喻  
者老丈謂何

奉心卓錢老師書

某豎儒也質愚而陋少賤且貧去  
秋不自意老師拔之儔伍之中置  
之拂拭之列于分不啻已足徼老  
師之靈又復濫竽南宮謬膺高第  
謂得老師提携而培植之可幸無

過以不負門墻乃終風暴起霆霹  
橫來老師拂衣而去都門于時忠  
潛然淚下黯然魂銷悲憤交集不  
能自己蓋悲者悲忠獨行之無倚  
而憤者憤老師直道之難容雖然  
人心不死公論猶存自老師罷而

縉紳士夫莫不扼腕愴惜卒不能  
抗一言于朝天下事所以日就頽  
亂敗壞而不可撐持者正由此公  
論之在下猶冀可以挽回扶曳不  
至一國之若狂者亦在下之公論  
也老師今而後田可耕親可養聖

賢之書可讀一去何損無論  
聖威有霽返旆無難也第正人君  
子充斥猷畝去國日益遠聞望日  
益高宗廟社稷之計日就于非僻  
有識者獨心憂耳老師不置天下  
于度外即若居能不槩于中耶老

師行後某日奔走紅塵中不知書  
為何物深懼以知人之哲貽累老  
師也惟老師終前日之愛復賜策  
誨無任感戢溽暑收令秋風漸寒  
希為道為天下保愛不宣

奉慎軒先生書

卷六  
三  
曩從巖數仰慕台光繼點清班樞  
趨揆席恭惟老先生閣下道學淵  
源人倫模範海內之士得其馨歆  
之餘與一左顧之下者雖復輕塵  
墜露莫不咄嗟增價如元英大呂  
當是時某雖辱諸君子之末祇承

提誨困守章句譬之孺子始就口  
食試使婆婆和和伊吾成語即已  
大幸安復敢呈伎倆弄音韻於大  
人君子之前問學無窮性天有路  
十年夙願某所私淑于閣下而趨  
趨不前者徒在文詞文象之間而

卷六  
三



閣下所獨証而不以語人者已絕  
法界人天之外譬之鴻冥鵬運而  
索者猶在于數澤不自知其形之  
穢也所喜慈雲盪眼甘露洒心某  
雖愚嘗奉教于君子矣天既使結  
毫髮之緣乃不令附門墻之末究

了無始一大事因緣耶柰何閣下  
衮衣休沐不肖亦馬首東旋從此  
雲白山青東西萬里譬之孺子伊  
吾未成早離石師禽息視肉即不  
顛蹶亦無用處居田未久徼天之  
幸惟我老公祖實秉左鉞而臨我

淄青文武經綸海波清晏覆露之  
餘竊心獨喜自負以為生平所願  
皈依于閣下而未能究竟其萬分  
之一者家學師承意者其借部民  
後見閣下衣鉢乎何則蜀齊隔遠  
自非夙因天不應使編氓世誼起

二因緣而老公祖亦誼篤通家禮  
隆汲引時時出小隊過郊垌授分  
論心天清日霽詎意里中群小惡  
念增長文致訛言輕喧睹聽斯乃  
某黑業所招於老公祖何成心之  
與有嗚呼不即境不當事不身嘗

不復知困辱之若斯也人世果有  
不可思議之因不可思議之果也  
市虎鑠金殆其末耳及事既往議  
已消毋論以老公祖之心入某之  
腸本自無事即彼始初構禍之人  
覓其形相了不可得法界原廣大

何必自生局促世路原寬平何必  
自為嶮巇某愚鈍推魯亦老公祖  
素所習知機心械事復向何處着  
脚幻夢場中遍生冤債某誠愚夫  
信不辨此日來閉門訟過惟有徹  
骨懺悔一事相不生人我業不造

貪嗔永矢弗諼佩以沒世此外更  
何言哉無知之人瞻視不過分寸  
謂某夙生所願親附于閣下兄弟  
之心因緣未終斯乃自生分別即  
閣下頗謂此市虎鑠金信有之耶  
毋寧閣下不遂棄我即老公祖遽

棄我耶閣下慧日普照四天之下  
伏寶笈度迷津應勿遺棄同室之  
人拈一莖草微笑示機當令大地  
山河盡脫是非煩惱此段功德惟  
祈閣下注慈帛昧具書言無倫次  
非所應聞於尊者自惟有肺腸而

不達與欺罔同罪故敢貢其項屑  
之至如此行人甚迫老公祖前不  
暇別具言輕瀆死罪惟閣下鑒其  
區區

祭文

錢太夫人祭文

維萬曆之癸卯歲某月某日太老  
師母錢太恭人卒於家太母嚴事  
舅姑相大師卓庵先生所至為名  
宦課兩丈夫子皆成名儒而吾師  
又為一時名吏曹且分其樂施終  
其身如一日而性復溫惠虛家庭

夏楚不加殲獲譙訶不及雞犬宗  
族皆化之為善良訃至凡吾師門  
下士官京邸者無不相對泣下蓋  
向聞母賢而近又知吾師奉母俱  
隱母在則師安母不在則師不得  
安一以痛死一以念生情自不容

已者顧無柰懷祿不能遠去枉自  
號天末由縮地謹于今歲甲辰五  
月五日門生趙秉忠粗具瓣香之  
奠致告於太母靈几而將之曰吁  
嗟乎哀哉太母胡遽逝邪前有至  
自杭者謂太母尚健飯忠且為吾

師遙相快也曾隔幾何時而忽有此始猶不信乃今日果然也吁嗟乎哀哉頃吾師在吏曹嘗無端以波及失官聞者方為師扼腕不能平而師獨恬然就道絕不芥蒂政虞失太母驩也迺太母謂兒嘗無

官今官失與無官時同而驩更倍已又曰在官行令在家行意兒今日可以隱矣吾亦且以老身與兒俱矣不得子為清朝之良佐更望子成聖世之逸民賢哉太母雖古詩書所稱曷以加此而乃竟逝耶

吁嗟乎哀哉既師結廬南山奉母  
偕出延歲月不虞冷落唯母歷春  
秋不知寒暑唯母飯脫粟不厭糲  
服絮緇不嫌惡唯母冉冉十年來  
得口不談時事目不睹紛華躬不  
接冠蓋趾不錯城市亦唯母子為

母驩母為子安竊意自今天地間  
別無可以代吾師之樂矣而太母  
胡竟逝也耶不當逝而逝太母即  
壽亦稱德而師寔情可傷心天乎  
向謂仕路虞風波今堪山林悲風  
木乎向愁事劉之日短今堪終天



之恨長乎誰無母而誰似母移喧  
就寂誰不死母而誰似母不死于  
邑屋死于露棲此時慈闈景滅哀  
子魂銷一襯尚存萬緣皆隔忠第  
意想耳且嗚咽不能仰眎而師何  
以支耶而母抑何能竟瞑邪若論

師所成立莩李滿門能聲滿天下  
即將來

皇上下尺一起廢官次第以吾師  
揔不可知而就今日已足不朽師  
不朽則太母亦且不朽固可含咲  
入地為吾太師鑿鑿報有子狀而

顧其如吾師當日不可支何忠故  
不得哭太母而念吾師思吾師  
而益以慟吾太母也吁嗟乎哀哉

張宮贊祭文

嗚呼吾德符竟何為乎夫其朝霞晃  
日玉樹臨風者吾德符之人乎雲

飛雨落虎躍龍翔者吾德符之文  
乎指揮天地上下古今河決下流  
驥就熟路者吾德符之識鑒乎郁  
然而蘭馨飄然而雪散者吾德符  
之譚笑乎天之慶雲地之靈岳物  
產之明月上清食貨之山珍海錯

者吾德符之意致之品格乎以是  
而入紫微驤天路雍容金馬一再  
銅龍吾謂德符必有為也而竟溟  
滓然死乎已乎止乎德符其遂絕  
意人間一往而不返乎惜吾德符  
有不可死者三而德符何以死也

位已偏於三台年甫踰乎二毛步  
光瀕其出匣來日又方未艾惜此  
可以死乎孤身久羈京華每興陟  
岵之嗟高堂近迫濛汜幾紆倚門  
之望曾昊天未報顧朝露之溘  
先令垂白之年櫻此慟割念當風

卷六  
之燭誰與晨昏惜此可以死乎况  
倚雲蘭桂有闕中庭哀淚烟霞堪  
悲後事就已駕之白雲凡百不問  
哀未亡之綠鬢鬢子何依使苗而  
不秀千載猶恨楊雄天若無知一  
世恫嗟伯道惜此可以死乎而德

符何以死也嗚呼哀哉天之生德  
符何為者乎德符之生何為者乎  
以才若此以遇若此以所就若斯  
之寥寥也嗚呼天地日閉光岳氣  
分達人異士已自邈焉不可多見  
間一見焉又復不盡其用承塵賦

賈玉樓題賀使珠庭日角之英王  
珮瓊裾之彥如雷一轟如駒一躍  
如白衣蒼狗倏尔變滅如飛花點  
絮旋逐東風而歆於石火光中金  
蛇影裏了牟尼之一大事豎范宣  
之三不朽不亦難乎嗚呼胡予之

豐胡奪之畜大治無情小兒善妬  
固信然乎興言寮采何堪靡撫之  
悲睠我邦國載軫云亡之嘆此吾  
所以哀哀含涕不止重有惜於吾  
德符也又寧為德符一身一家之  
故乎嗚呼已矣上苑游麟知太平

之有象帝梧鳴鳳識純嘏之大來  
麟兮鳳兮亦不過瞥然一見耳夫  
使麟而可以長為天閑之御鳳而  
可以長為鷄樹之棲也更不貴矣  
而安可少紮嗚呼此其德符之所  
以為德符者乎竟何為乎復何為

平

誥封一品太夫人李母祭文

代作

太夫人之生胄啓神明宣猷翊運  
濯聲靈人疇與之埒其榮太夫人  
之沒水土奠平灑沉澹菑寰宇寧

天克相之考其終固知太夫人一  
身隆啓佑之大闕世運之重而非  
齊彭殤于一軌較寤寐乎死生者  
矣憶昔播酋倡亂重于天討太保  
奉簡書興問罪之師遵庭訓而敷  
壯猷殲虎兕于龍圉西南清晏

主上宵旰之憂釋封翁當此時而  
歸元化人皆曰封翁之終終以西  
南半壁之奠安也寧惟封翁太母  
亦然比時太保凱旋素鞞栞栞外  
以襄大事入以奉慈母太母方且  
膺綸綍之寵榮垂山河之繡黻含

飴弄孫怡怡然樂未幾河伯逆流  
天吳為孽太保復承簡書董瓠子  
之役遵慈訓而歷荒度導黃流于  
南旺開洳口于北陸園陵鍾簾弗  
移而運道艤艫弗阻

主上宵旰之憂釋太母曰吾可以

與化盡矣向使河工未興太母告  
終誰任司空誰奏平成則太母之  
終終以南北河流之奠安也方太  
保之經營太母娛春暉于北堂均  
諸艱之歷試太母身際盛滿身見  
太平而逍遙以遊于帝鄉是我國



家戡定勛勩之烈太保手扶之以  
還于國而啓佑義方之訓太夫人  
目覩之以還于家生不後時死不  
先時諒明德之不偶實天道之無  
私留治平于天下俾太母集今古  
之繁祉也卹典自天祭壇遣告馬

鬣穹碑龍章顯號垂帶礪于雲初  
列九閭之虎豹太夫人非所謂備  
生榮與死哀而開子孫之作忠作  
孝者哉太母一旦捐館舍所塚者  
此電光泡影之迹耳至若措社稷  
泰山之安樹華夷永賴之澤彤陛

錫之彤弓玄夷錫之玄圭天下後  
世跂仰太保則天下後世稱頌太  
夫人之令名遐福固與天壤無窮  
期也某以桑梓么麼夙欽太母之  
懿範頃宦東魯迷謬指南提誨陶  
鑄仰戴二天其覆幬幘幪之量太

保明施之太夫人實陰賚之矣語  
不云乎先河後海有德必讐有言  
不改百年萬億有如母在某即今  
東西南北之途莫非天地某即今  
溪澗沼沚之毛莫非胸臆冀太母  
之揚靈響天風於寶璐

李提督祭文

嗚呼悲哉有涯者生不滅者名曷  
所重輕壯夫志績侯封廟食何辭  
裹單烈烈君侯邈焉寡儔流耀陽  
秋粵自束髮英風卓越氣吞胡羯  
締武經文勇略忠勛爰統六軍一

劍截齧縱橫虎穴寢皮茹血奕奕  
膚功聿纘上公簡在

帝衷維群不逞構兇為梗西陲陳  
警乃荷特知遂介而馳六月出師  
肘印如斗四牡孔阜有嘉折首封  
之京觀飲至告歡植國維盤長鯨

盡躍外藩遘虐海氛甚惡  
王命元戎秉鉞而東用靖不共戰  
則必克島夷喙息寔興滅國睠彼  
遼陽匪將之良莫鎮封疆戾為國  
胄忠勇天授勞勩丕茂弗詢盈庭  
錫命寵膺作我長城益感盛際貞

誠逾勵死綏在志袖握青蛇未靖  
龍沙何以為家赤悃自矢曰必滅  
此上報

天子天之難謀乃啓戎心毒戾孔  
深孤軍窮北風霆搏擊黃霧四塞  
彼其雄威詎難潰圍保軀以歸曰

得死所爰酬夙許爰答  
明主徒手奮呼肝腦委塗殲命胡  
奴凶問入告  
帝用震悼議隆厥報賻卹殷繁式  
馳殊恩懋獎勇魂嘉名載易崇宇  
斯赫榮施無斃夫孰非臣夫孰非

人夫孰非身殺身自致人綱靡愧  
臣節靡貳天地為長日月為光何  
存何亡某等粉榆夙雅訃傳朝野  
臨風淚灑莫籲高天星實中權曷  
盪羶羶弗究厥用罹此慘痛寧曰  
私慟哭以長辭將以一卮遙寫哀

思北望絕塞愁雲掩霽靈爽如在  
悲哉

李先生祭文

萬曆丙午二月某日明奉議大夫  
太常寺卿容翁李老年伯卒於家  
修撰年家晚生趙秉忠設位於庭

拜而哭之已拭淚南嚮而吊之曰  
嗚呼伯翁德範隆劭襟中淵中後  
生小子於何窺涯涘而望落從憶  
從戊戌偕翁季子太史公讀書中  
秘回事翁於長安邸中稍得其岸  
略翁以上相詰嗣策步天衢紆朱

拖紫於陞祀文石之間垂二十年  
小心勤慎如一日人高其有數馬  
置對之風與人交絕無城府時而  
言笑時而緘嘿總之徐徐闇闇若  
春風惠日廣大無垠物物被其和  
者多矣坐中一榻一几几上焚香

觀書清適閒曠栩栩然悠悠然不  
知身世在塵寰與塵寰中有機心  
機事也人有犯者弗校僮僕有過  
者直以寬語解之一時長安縉紳  
莫不頌翁長者而又勤於汲引一  
段謙光憐材至誼不啻其口余以

猶子數過翁翁數與進下榻設醴  
丙夜達曙多道古今盛德事挹芳  
飲醇不覺余心醉矣世稱吏隱未  
見其人翁繇符璽晉奉常面如紫  
玉髮若白鶴簿書無煩陸沉金馬  
東方曼倩其儔也迨倦遊上章休

致

主上嘉其世德弗許遂銜使命以  
行太史請告扶持翁于私第翁出  
都門以六月太史出都門以七月  
余念慈闈繼出都門以九月歸而  
定省旋拜先君墓墓木拱矣荒園



宿草霜露淒其不勝負米之嘆風  
木之悲也因羨淮南故人此時必  
且開北海樽奏南陔樂以暢叙天  
倫於綠野此何論玄成相業與萬  
石君家休沐也翁素願養葆和而  
太史承顏問寢從此百年可須臾

待曾時幾何遽報詰人之長往也  
嗚呼痛哉疇昔京邸把袂徘徊暫  
時南北冀翁復來翁即堅卧不起  
郵使可以相通音耗可以相聞一  
言一行作我儀刑猶然北面于一  
堂之上曾時幾何遽報詰人之長

往也嗚呼痛哉翁之光裕業已無  
憂翁之德福業已無量翁之令聞  
令望業已永終是皆足以不朽不  
滅何必百歲而稱壽哉翁歸矣目  
可以瞑矣惟是翁病余不知時翁  
歿余不及殮翁殯余不及憑棺而


痛則猶子之誼謂何渺渺余懷當  
于何日牽總帷吐此胸中之抑鬱  
也哉即今遣一介之使布椒漿之  
奠哀悰莫罄衍而為誄誄曰肅皇  
爰立相君宰衡調元幹運泰階正  
平克開遐裔奉常篤生倚天玉樹

承露金莖亢宗仙李蚤譽淮洲澤  
綿鼎鉉業紹箕裘起家符璽造跡  
皇州典司勤慎茂著忠猷大啓慶  
源繁昌孫子白虎銅龍鳳毛麟趾  
玉筍聯班南橋北梓瓜期奏最綏  
膺福祉晉秩奉常吏隱清卿上章

解組未許投纓皇華原隍結伴鷗  
盟局完出處標樹崢嶸太史寧親  
式遄其行桂林舞綵宮錦趨蹌稱  
觴介壽醴瀉銀潢鳩杖藍輿泉石  
尚羊耄耄游登永錫壽考大官供  
奉優游享保天道豈忌惟善是寶

胡不憖遺倏焉蓬島嗚呼痛哉客  
歲之別同次外寢祖道張筵待席  
接飲自時迄今尚未盈稔夢寐  
墻穆兮如暉訃音俄傳涕泗沾襟  
幽明間隔傷悼人琴在疾不省於  
亡不臨舉聲揮淚哀有餘音嗚呼

痛哉



六  
六

六  
七

